

la procession fo leete. Scrive dil zonzer li con monsignor di la Trimolia e missier Zuan Jacomo Triulzi, et subito sarà il zeneral di Normandia; sichè tuto l'exercito subito sarà unito di qua da' monti, lanze 1500, fanti 14 milia in 15 milia, cavali lizieri 800 pagati, senza i arzieri. Scrive come missier Zuan Jacomo mandò avanti el signor Camilo suo fiol con alcune zente in Aste e ave quella terra, et vene in Alexandria; ma spagnoli li fu a l'incontro poi intrato, et vedendo dito Camilo non esser bastante, si ritrase in Aste. Ora mò l'exercito di la Christianissima Maestà è di qua da' monti, et in 8 zorni spera esser in Milan, ma se ritroverano in campagna tra Aste et Alexandria per questa settimana; et erano quel zorno partiti il Trimolia e il Triulzi capitani con lanze 800 e fanti 9000 e andati in Aste, e lui aspetava il zeneral di Normandia ch'el di sequente dovea zonzer li, e si partiriano con il resto di l'artelarie per trovar li diti capitani.

157 Et per letere soe particular, drizate a suo fratello sier Polo Malipiero, vidi come aspetavano il ducha di Albania, qual era andato a levar le 300 lanze erano in Lenguadocha et veria per una altra via, per il Monsenese, a passar i monti; e come li presoni nostri lassoe a Lion a di 15, et li nomina, ai qual à servito di danari, et con loro era il zeneral di Normandia restato, quali verano in Provenza a passar a Zenoa. Et scrive a chi à servito di danari per levarsi, quali li hanno fato letere di cambio; e con lui erano do soli: sier Sebastian Malipiero qu. sier Troylo, era camerlengo a Cremona, et sier Piero Contarini qu. sier Zacaria el cavalier. Et dito sier Piero à auto ducati 200, sier Lorenzo Contarini qu. sier Piero ducati 70, sier Bernardin da cha' Taiapiera qu. sier Nicolò ducati 55, sier Jacomo Manolesso ducati 40, sier Andrea Dandolo qu. sier Polo ducati 40, sier Vicenzo Venier ducati 50, sier Sebastian Bon qu. sier Alexandro ducati 35, sier Alvixe di Garzoni fo capitano a Bergamo, sier Andrea Contarini fo castellan a Brexa, et sier Lodovico Michiel, fo castellan a Caravazo, venivano poi drio.

Di sier Marco Dandolo dottor, cavalier, orator nostro in Franza, qual fu preso capitano a Brexa e fato prexon, di 13 et 14, da Bles. Dil suo zonzer li, e altri avisi in zifra; et a di 15 partiva con il Re in persona per andar contra englesi; le qual letere per esser in zifra non fono leete etc.

Fu facto la processione per la piazza San Marco justa il solito; ma più bella assai et assa' cere et paramenti bellissimi. La scuola di la Caritae con Batudi

oltra li anzoleti con arzenti in mano; la scuola di San Roco benissimo in hordine e soleri e representation di la Bibia; fu bel veder. *Etiam* quella di San Zuanne fo in hordine, et soleri, et altro, et arzenti. Poi, de' frati, quelli di San Stefano feno polite cosse; di San Zane Polo soleri et altro, et cussi di frati Menori, *adeo* fo bellissima processione, et con arme dil Papa, San Marco, dil Doxe, dil patriarcha et *etiam* dil re di Franza e non d'altri. Poi vene il Principe con do episcopi avanti con mitrie e piviali, *videlicet* Saracho di Lepanto et domino Dominico di Alepo di Chisamo, et poi il reverendissimo patriarcha nostro. Il Principe vestito di restagno d'oro; l'orator dil Papa et l'orator yspano, qual ozi vene per non vi esser di Franza, et l'orator di Hongaria, et domino Jacomo Stafer capitano di sguizari con el primocierio di San Marco, et la Signoria et altri senatori assà numero e ben in hordine di veste di seda, et do d'oro, sier Sebastian Justinian el cavalier, et sier Cabriel Moro con becheto d'oro. Et fo compita dita procession a ore 14, che fu molto presta, e fata con gran contento di la terra, per esser da ogni banda venuto bone nove.

Et compita la processione, il Principe, zonto a la schala dil palazzo dete licentia a li oratori et procuratori per esser vecchii, et andò suso e se reduse in Colegio da basso, e fo leto le letere di sier Andrea Gritti, et di campo di sier Domenego Contarini venute ora, date pur a la Volta in mantovana, a di 25, ore 14. Come il signor capitano zeneral ha ricevuto la roca di Peschiera ben in hordine di artelarie e vituarie, e postovi dentro sier Alvixe Bembo provedador executor, e a Valezo sier Zacaria Gixi. Et come, a di 26, da matina, ch'è ozi, il campo tutto se levava de li e andava a Ponte Vico dove si fermeria; et altre particularità zerca danari bisogna in campo.

È da saper, cossa notanda, in tal zorno dil Corpo di Christo, facendosi la processione qui, sier Polo Malipiero have nova sier Andrea Gritti procurator fo preso a Brexa e conduto a Milan, per letere aperte di sua mano, come l'era mandato in Franza; et ozi è venuto letere sue dil zonzer a Susa di qua da' monti.

157* Noto. In questo Consejo di X con la zonta, che fo eri, fo preso e deliberà de gratuir il reverendo domino Bernardo Bibiena prothonotario apostolico e thesorier pontificio, qual è il tutto con il Papa et fratello di domino Petro ch'è qui orator dil Papa, di darli sul nostro Dominio beneficii per ducati 2000 de intrada, e fo comandà grandissima credenza di questo.